

西
堂
詩
集

看雲草堂集卷三

長洲尤 侗謨

自辛丑至壬寅止共詩七十一首

恭輓

世祖章皇帝哀詞八首

曾記前朝銅馬年萬家雪淚洒冰天蒼黃七日秦庭哭
縞素三軍燕市懸京洛山川春再秀茂陵風雨土新乾
先帝命修
崇禎陵 只今 聖主登霞日故國遺民更泫然

入關一戰建戎功傳檄方州遂大同禹貢遠通銅柱外
武成端拱玉衣中躬親汗馬勤諸將俯接降車禮上公

恨不百年撫九夏載橐弓矢奏南風

十載臨朝理萬幾

親政自八年始

清宮動色念民依鞠哉庶正

當憂旱咨爾司農爲賑飢逋稅屢年蠲白屋赦書一夜
空園扉不知 帝力今何有野老深山淚滿衣

百工濟濟盡鳴珂拜手誰賡元首歌自是周官六計少
非關虞典五刑多滿朝載錫封章寵便殿時承笑語和
此日烏號空隕涕報恩無地竟如何

元后聰明亶莫加牢籠萬物盛才華丁年朗鑒知千里
甲夜觀書滿百家罪已翻然同大禹補天不自號神媧
伏聞遺詔彌留日王業艱難幾歎嗟

綴衣無復近天顏
內殿淒涼歌舞班
石馬一朝遊地下
鈿車幾日去人間
漢宮落葉傷羅袂
蜀道淋鈴憶玉環
不信蒼梧南狩日
湘妃先葬九疑山

謂

端敬皇后

黃帝順風游
具野穆王觀
化向崑崙
聖人獨出三千
界初地能參不二門
日月光華弘有覺
衣裳恭默悟無

言金沙脫屣歸何處
滅度應居祇樹園

先帝召木陳玉林諸禪師參究

宗旨

自歎邊關蟻蝨臣
歸田畊藝荷皇仁
相如賦草傳宮
監李嶠歌頭教
內人負曝有心誰
爲國攀髯無路尚
餘身平生知己猶
惆悵况感恩私在
至尊

宿古法堂題遠上人卷子次龔孝升先生韻

榻來尋古寺滿徑濕雲封
丈室依雙樹孤燈對萬峰
湖山春載酒風雨夜聞鐘
拈取梅花看爲君剖五宗

玉峰訪馮靜容校書有贈

曲巷低迷油壁車
旁人爭指小憐家
湘江香草傳青管
姬善巫峽行雲隱碧紗
有意抱琴歌宛轉
無緣滅燭醉
天斜閒情久作沾泥絮
又逐東風楊白花

靜容招同蒼孚雲客珍示菽蒴曲譙聽歌疊韻二

贈

紅羅障子紫駟車
鬧掃梳粧學內家
玉鏡輕黃勻素面

香奩淡墨寫文紗坐移簾幙秋光好起舞杯縈月影斜
惆悵南朝簫鼓歇清歌猶唱後庭花

同諸子譙珍示堂中觀靜容演西子紅娘雜劇再

疊前韻

錦瑟迎歡金犢車霓裳一部本仙家鐘聲曉寺來傳簡
花影清溪出浣紗珠箔驟飛白雪下画梁常裊彩雲斜
都疑此夜覓銷盡背語教人剪燭花

殿聞書齋雅集靜容不至疊韻怨之

四筵高設麴盈車拚醉紅裙劇孟家上客無言彈画燭
美人如夢隔煙紗從來好事彩雲散何處佳期晶月斜

自分髻絲禪榻畔敢攜春酒嫁梨花

留別靜容疊韻畢

無計消停青鈿車布帆容易便歸家
紅紅歌串拋朱豆灼灼啼痕封絳紗
南曲關心人去後西風回首雁橫斜
還期九月秋江上載酒扁舟看荻花

附靜容次韻答贈詩

掃眉才子忽停車鸚鵡傳言到妾家
三日名香留坐褥五雲彩筆照窓紗
青衫肯惜紅顏薄翠袖容扶烏帽斜
珍重春風數相訪小庭新樹枇杷花

無題和葉九來韻

靜掩蘭房自作春博山心字禮花神舊題桃葉充書記
新教烏衣號舞人荳蔻曉風舒玉蕊芙蓉秋水動香塵
生憎十二峰頭色學得長蛾一半顰

上制府郎尚書

白馬青袍位上公黃旗紫蓋出江東輕裘坐肅南樓月
羽扇長揮北固風賓客紅蓮談玉帳將軍細柳掣雕弓
只今瀚海鯨鯢息露布猶傳第一功

續滿城風雨近重陽

并序

潘邠老滿城風雨近重陽極爲佳句惜催租人敗意
而止今秋重陽風雨大作悶坐無聊因其句續至十

五首事既不倫語亦無次比于寒蛩四壁自爲唱歎而已

滿城風雨近重陽處士西疇今已荒莫去登高勞悵望
秋風離黍最淒涼

滿城風雨近重陽九月幽風盡築塲一夜腰鎌先刈了
黃旗隊裏擢船郎

滿城風雨近重陽無雨無風禾倒殢萬馬縱橫秋色裏
幾曾日夕下牛羊

滿城風雨近重陽野哭千家煙火荒忽報征南軍牧馬
又攜婦子渡橫塘

滿城風雨近重陽齊女門前開射堂老去悲秋何處醉

藍田新改虎侯莊

新駐滿兵
圍住民房

滿城風雨近重陽鐵騎如雲爭曲房公子家名馬糞巷
將軍宅賜鬪鷄坊

滿城風雨近重陽十口無家倚道旁剛抱鏡奩和冒絮
出門一步卽他鄉

滿城風雨近重陽百道軍符捉野航寄語武陵溪上叟
早迴欸乃入瀟湘

滿城風雨近重陽白日孤村走蹶張帶甲新投都護府
橫刀不避尚書郎

滿城風雨近重陽剪紙招魂滿建康一夜淋鈴聞鬼哭

可知唱道念家鄉

金陵戮士
十八人

滿城風雨近重陽覓句催租底事忙不見逋糧一萬戶

南冠相對正倉黃

提問十七年
奏銷紳衿

滿城風雨近重陽門外追呼無地藏望斷白衣誰送酒

江州太守只催糧

滿城風雨近重陽寥落笙歌鬪上方惟有健兒同猾吏

画船細馬過山塘

滿城風雨近重陽撥悶寧辭解鷓鴣漫勸菊花延壽酒

浮生無計度年光

滿城風雨近重陽
度厄空思費長房
若遇壺公能縮地
煙波一棹五湖長

送古如上人入花山

垂老方安坐西山
古木中千花能喻法
片石解談空行
藥秋光白拈
碁佛火紅飄
零許長史何日侍支公

送許竹隱司理思州二首

送爾南征客單車
度架溪去程千驛
遠上日百蠻齊夜
雨鳴銅鼓春風舞
竹鷄持杯呼李白
近在夜郎西
莫道黔中遠春衫
快壯遊揚旗招峒
長遮馬拜君侯白
石梅花嶺青溪杜
若洲知君重回首
尺素慰離愁

送曾道扶司理漢中

江陵驛路滿梅花計日連雲出谷斜
大丙山高環二華五丁峽險接三巴
蒲鞭約法隨羌俗驄馬威儀近漢家
更上陳倉懷古跡武侯殘壁起悲笳

舟中連雨

漏天何日了高臥尺篷孤但聽水
嗚咽不知山有無春心粘柳絮客
夢冷菰蒲却羨溪邊叟綸竿入畫
圖

江郎石

石者白爲雲雲者青爲石雲石不可知
一片空濛色三峰豁復開面面芙蓉
出天半卓竒文千古江郎筆

仙霞嶺

仙霞嶺上天何小仙霞嶺下人如鳥策杖纔穿紅樹坳
捫蘿忽度青松杪仙霞嶺過楓嶺出大千小千交翠嶽
怪石千拳鬼搏人飛泉百口雷驚蟄停車五里卽僧家
開遍堦前春鳥花卽杜鵑花土人呼爲春鳥輿夫笑入竹林去剝笋
挑來點白茶

聞鷓鴣

鷓鴣聲裏夕陽西陌上征人回首低徧地關山行不得
爲誰辛苦盡情啼

至建寧送朱素書往汀州

細雨錢塘共放舟，殘燈濁酒幾淹留。
日扶短竹穿危嶺，夜擁寒衾枕急流。
山鬼路深花窈窕，土人語雜鳥鈎輳。
送君更上臨汀去，春水平添萬里愁。

生日

半生生日長爲客，愁絕孤踪閩海邊。
萬嶺黃泥荔子國，三春黑雨鷓鴣天。
羞窺明鏡添華髮，笑擲空囊乏酒錢。
吳市吹簫燕市飲，古人失意有誰憐。

梅福山

故在吳門市，何年到此山。
變名久世外，占夢尚人間。
碧草纔通徑，紅雲自掩關。
夜深吹鐵笛，知是采芝還。

浮石洞水

中時開

聲

同鄭山公游光孝開元二寺

策馬渡河去尋山到水南
荒煙橫古道老樹隱名藍
酒放陶潛醉花開迦葉參
佛牙空一尺對客未曾談

寺藏佛牙

食荔枝戲作

緩褪絳羅襦親看白玉膚
微酸少女性柔滑美人圖
九晚依蘭友千頭使橋奴
阿環曾一笑老子興能無

客思

梵刹新涼起薜蘿征衣蕭瑟問如何
四山古木蟬聲急
一夜西風蛩語多
芳草似啼垂玉露
美人有夢隔銀河

閒將客思題梧葉翹首天南無雁過

贈順昌丁令

丁曾司訓撫寧子故吏也

榆關班馬幾徘徊絳帳曾推鄴下才千里忽飛仙令舄
十年重把故人杯
併欄雨過新桐引蘭蕙風生晚閣開
盡道南溪丁字水今朝端爲使君來

寓地藏堂示美中上人

不慚爲熱客却喜得空生解帶知風動開堂見月行
玄亭嘗載酒白社可尋盟
獨恨晨鐘急還家夢未成

同丁令游普慶寺

偶共臨邛令閒過祇樹林水聲幽澗落雲色晚山陰
暫

聽無生話能安久客心坐深來爽氣松下正橫琴清生小師

善琴

戲贈楚山上人

偶爾游閩海云何見楚山威儀湘月皎意思岳雲閒語
錄身相等離騷手自刪更圖巫峽夢參破老禪關

小病

漫游貪作客小病劇思家消渴調甘草餘醒點苦茶關
心起夜半分手隔天涯緩急需僮僕寒暄問總差

謝人送蘭喜成

美人日暮至有客共閒房神女衣長翠昭儀體自香金

風開笑靨玉露裊啼粧歸去無人妒依依雲髻傍

別山公

武夷不可見喜見鄭康成
眉宇青山色高談翠瀑聲
蕭齋書縱讀曲几酒頻傾
別後空相憶漁梁古木平

別楚山次來韻

獨上雙峰兩屐攜別君又踏嶺頭泥
江天夜月孤帆遠海國秋風萬木齊
花落毘邪寧有相草書蕉葉本無題
他年杖錫能相訪但看門前溪水西

自君之出矣二首

自君之出矣日夜啼紅雨
得君嶺頭書水深三尺許

白君之出矣多病減容輝藥爐空不煮愁見蜀當歸

黯淡灘

正值支離日偏逢黯淡灘扁舟戰巨浪六月使人寒

延平劔津

神劔不可求津水淙淙下怪石立中流疑是青萍化

画眉鳥

何事張京兆秋風弄好音蛾眉今不見画盡遠山青

上灘

百步便逢灘灘高似上山水中石齒齒石上水潺潺負
曝長年急迎風百丈艱安眠兼飽食估客却愁閒

舟遲寫悶

兩槳打逶迤終朝程幾何只看紅樹在不覺白雲過水
落游魚小山空啼鳥多不知家遠近西望是明河

再題江郎山

吾聞江郎山上有仙人居石首豬涇池灼灼生芙蓉一
朝大風雨墜下十尺魚野人竟烹食白龍困豫且不知
何樓閣窈窕飾綺疏遙望火三日朱煙蔽丘墟乃知大
宙數天地不能除滄海或揚塵昆明劫灰餘好奇有周
生架木升空虛道遇黃冠叟大笑爾何迂此間無坐處
亟去勿趨趨俛視木已爛惶懼返故廬惜哉志不果翻

爲頑仙愚我則異于是風馬雲爲車歎然登其巔啓讀
金簡書以此配二鳥西母且勝予大言固非妄神氣無
不如莫守土木骸兀坐空籃輿

釣臺

磻溪老匹夫淮陰惡少年垂餌釣齊楚志不在臨淵豈
若羊裘子清節千秋傳帝腹雖可加不如空山眠高風
竟寥絕客星長孤懸異哉謝臯羽慟哭西臺顛楚歌竹
石碎淖鬱來雲煙此意人不識先生知其賢行跡雖不
同易地則皆然

放歌五首

閉戶忽不樂拔劍遠行游空囊挾百軸徒步歷九州有
司小兒多齷齪愛錢憎客如仇讐馮驩彈鋏不見聽禰
衡懷刺誰能投丈夫出門無知已不如還家對妻子所
以相如臥茂陵眉画青山鼓綠綺

人生得失何可計十嘗八九不如意史公上書救李陵
中散彈琴忤鍾季我亦茫茫悔恨多獨坐書空咄怪事
雖知四十九年非五十幾何老將至只今萬事悲疇昨
聚鐵六州難鑄錯回頭除是再來身不如縱酒聊行樂
君不見李斯相秦并六國之罟銘功碑百尺一朝束縛
咸陽市牽犬東門豈可得功名富貴本何常凝兒圖據

千年強高軒大蓋騎鄉里
鹵簿驅人屏道旁薰天勢
箠有時盡捕車忽至驚蒼黃
顧視妻孥但涕泣面如土色
無輝光從前炙手竟安在
羞君意氣徒洋洋何如野老
茅廬下仰天長嘯歌滄浪

男兒致身重恩怨怨在睚眦
恩一飯侯嬴刎頸送夷門
荆軻喋血環秦殿雖然感激過
不平快意目前中無憾
可歎悠悠輕薄兒翻恩覆怨任
爾爲蕪亭厚意久不報
酒食未寒戈矛隨握手肺肝出
相示掉頭毛髮棄如遺
世上負心十八九了此只須一
七首嗚呼安得季布朱
家結爲友更有紅線隱娘娶作婦

娶妻當得陰麗華生子當如孫仲謀結交常食三千客
居官兼領二百州人生如此差快意但日飲酒彈箏篴
君言太高苦不足天若聞之天亦愁我有草廬負郭田
衣食裁足聊優游熱卽乘風北牕下寒卽負曝南山頭
燕姬趙女皆黃土秦皇漢武已東流生年滿百會有盡
白楊蕭蕭復何求

題穹窿山贈施鍊師

百尺崇岡蔓草封鍊師于此闢玄宗陵曾自聳雙金闕
聞闕長鳴萬石鐘曉唱步虛招羽鶴夜書谿落呪茅龍
他年杖竹還相訪採得靈蔬問赤松

赤松子采藥此山

題画三首

天井轆轤轉人煙埤垸直撲敝棲鳥驚山僧扶杖出
明月照怪石幽人坐深酌一吹鐵笛聲萬里叫黃鶴
白沙雁鷺迴青草牛羊下遙聞笑語來野老樵薪罷

看雲草堂集卷四

長洲尤 何撰

自癸卯至丙午止共詩五十九首

送程翼蒼助教入都四首

送君兩馬去冠帶滿橋門依舊先生饌重新函丈尊談
經青火出習禮絳衣存石鼓周王篆閒時細討論

數載吳門納 屈絳帳時文翁興古學束皙補亡詩吾
道歸京國諸生立路岐祇看桃李樹盡縮別離枝

画舫行天上流澌及早春裝書青草岸載酒綠楊津建
業家園舊扶風女樂新維揚鼓吹地花月正宜人

翼蒼
寄祭

白下納姬廣陵

草堂陳楚舞綺席唱驪歌兄弟天涯別鶯花人日多東

風吹錦纜明月渡黃河回首吳山暮相思奈爾何

人日
子錢

之草堂

寄宗伯王夫子二首

負劒辭函丈垂鞭出國門著書惟仰屋種豆且耰園曾
乏驅馳効空銜咳唾恩何時陪舞鶴紅燭醉微言

懷來
鶴軒

夫子懸車後尚書行馮時

督處
宗伯

朝廷倚柱石賓客滿

堦墀紅藥翻書院烏衣照墨池侯芭劇可念四十髻如

絲

寄龔總憲五十韻

帝夢思良弼官占得大臣天心尊簡在古道迤忱恂軒
紀風從后周翰嶽降神少卿傳渤海公瑾起江濱知畧
堪磨盾文章工斷輪高標樓百尺巨筆弩千鈞司馬皆
餘子雕龍等下陳西京歸大雅東國仰人倫劔履排黃
閣風流動紫宸淵雲弘黼黻雷雨鬱經綸錄進千秋
鏡詩陳七月幽乃心存輔翼惟口敢批鱗國是類書
笏天威自岸巾先皇嘗歎息此老固忠純驄馬多
強項青蠅會反唇功成身易退位屈道彌伸其若蒼生
望因茲黃髮詢御前求奏劄柱後錫簪紳兩府知名

舊三臺執法新巖巖班突兀嶽嶽氣嶙峋埋轂推當道
泥樓縮要津獻箴期寤主補牘爲憂民竭澤勤深念

蠲逋廣至仁黎甿方鼓舞墨吏且逡巡羽檄將軍怒鞭
笞野老呻勾名會計上變籍役田均萬井呼庚癸千家
避戊申東南真旁午左右在同寅廊廟需梁棟江湖招

隱淪珊瑚四面網樸械一興薪不乏登朝彥寧無入幕

賓薦賢原爲國得士豈呈身

自蜀澤以下皆
總憲條奏事也

賤子同夫

已零丁獨不辰烏窮哀趙壹貂敝老蘇秦陋巷飢驅我
空山鬼笑人徒勞出塞苦莫救抱關貧攜襆辭官牒披
裘把釣緝蓬蒿常寂寂鈿槩漫齷齪聖德如文祖禪

宗有道忒子虛誇狗監簫管教蛾嬪孟浩言辭拙虞翻
骨相屯無由叫閭闔終已臥松筠每戀長安日恒懷黍
谷春鶩駘欣剪拂薛暴辱陶甄尺素時烹鯉初筵勝飲
醇蚊因負驥遠子豈得回親吾志彈流水公言賦采蘋
西風坐蕭瑟北斗望輪囷非敢希前席何當步後塵丹
青藏箆願與画麒麟

送蘇明府歸秦

辛苦長洲令居官僅一年催科野老粟挽繹大兵船政
績餘碑記歸裝乏俸錢好移彭澤柳去種杜陵田

蔣虎臣太史在顧草堂論詩將入萬峰參坐長歌

贈之

虎臣先生住句曲身披紫霞騎白鶴道上人呼王子喬
帝命較書留玉局玉局金門暫遊戲掉頭却臥王孫桂
養疾惟刪本草經出門遍寫名山志竭來一棹闔閭城
小園庾信相逢迎脫帽草亭恣談噓青山對面涼風生
酒酣擲我驚人句如入瑤林數瓊樹臥龍跳虎豈能名
出月穿天不知處酒醒復讀大悲作一口西江竟吞却
長齋繡佛妙香聞宴坐毘耶雨花落不見西京士大夫
貂蟬金魚玉鹿盧可憐熱官皆炙手如公素心天下無
乍喜林間一把臂蒲團又入萬峰地歸來只點趙州茶

賀爾心空重及第

麗居士詩此是選佛場心空及第歸

賀友人遷居

甲第初開画棟平東郊喬木喜遷鶯新題公子烏衣巷
舊識將軍細柳營送臘煖爐圍燭跋班春綵仗掛簾旌
還憐斗帳沉香火坐對雲鬟爇玉笙

哭宋疇三

嗚呼小宋歿春秋三十四僅過賈生一差強顏子二人
生不滿百懷憂常千歲如何撫壯齡彈指成一世憶昔
結交初君年方韶稚同巢三鳳鳳粲粲名臣裔處姊託
高尚出者仲與季鷄壇捧玉敦文墨標赤幟車馬聚江

千紵縞陳堦次三月曲水鷗樓船讌高會末座一少年
抵掌談天地開拓萬古心推倒千人氣四方驚屬目日
出青萍銳吾道倚干城匪獨重才莠伊予望衡宇往來
成密契彭子硯北賓二難偕龔礪風雨每連淋關河恒
結轡博搜山海經縱論人物志雖當水火爭不渝金石
誓多君闕閱家蕭然林下意楞伽案前堆黃庭肘後繫
彈琴寫閒情行碁矜絕伎藥裏滿淋頭鷓歌仍不廢時
寓遺世言人淡無俗味焱忽壯懷發虹蜺吐天際戊子
長干游同舟大江濟阿兄發弧登吾子副車置鼓篋入
碎雍聲華蜚幽薊辛卯薦賢書金懸咸陽市公車雖屢

蹶未嘗不得志家有太史公門多文中弟汝南推且評
立亭問奇字終當奮巖廊夫何困牀第涉世苦百端勞
生非一事一酒臯魚血再雪安仁涕倉皇戎馬間黃符
捉逋稅鬱鬱憂傷人形神日憔悴消渴長卿亡嘔血長
吉逝修短雖天命吉凶由人致君素善豪飲淳于一石
醉酒闌重秉燭竟夕呼盧戲精氣坐銷磨顛倒失興寐
頗好素女方後房饒佳麗自非枯木禪未免爲情累雅
學岐黃書雜投參苓劑扁鵲有後言知醫故不治愧我
乏箴規使爾耽疑滯生日歡幾何死來悲難旣兩兄各
天涯孤兒襁褓內愛妾擁幃啼周親泣反袂念之摧心

肝拊牀唾壺碎。叔夜廣陵散士衡華亭淚。銅雀望西陵。
達人猶貽刺。君固讀書者。懸疣知生寄。正命得全歸。歿
壽本不貳。往從先大夫。九原應相慰。脊令誼急難。千里
策飛騎。執紼不勝哀。立孤豈辭瘁。大事旣永畢。蓋棺可
瞑視。千秋身後名。茫茫何足計。向吾與君言。無生第一
義。苟悟寂滅學。去來無拘係。聞君疾革時。二豎神爲祟。
學道一間隔。道存魔亦至。見苦而斷集。悔不修四諦。君
今冥漠中。堅心持半偈。人天任輪迴。因果定不昧。爲鬼
能求法。墳頭雨花墜。吾輩情所鍾。人琴餘歎欷。持此勉
故人。強制山陽淚。素帷何飄揚。遺容尚髣髴。巫陽升屋

呼覓兮歸來未盡我一尊酒質言諒無忌聊以代驢鳴
少佐生芻祭

寄懷周副使伯衡

索居忽不怡追游念疇曩塞下苦風霜山川梗榛莽
邂逅至嘉客奇懷討幽賞並馬陟高臺蕩舟攬魚網清談
資獻酬濁酒足俯仰分攜十載強此景成恹恍予旣解
塵纓負薪而拾橡田園久荒蕪金石徒慨慷緬懷彭蠡
豬故人駐英蕩旌旗南浦雄鼓吹西山爽日暮香爐峰
誰人共來往我欲逝從之臨流歎河廣空懸徐孺榻未

汎王猷槩

賦得采菊東籬下悠然見南山

鷄鳴啓柴關秋色隱庭樹車馬無俗囂琴書有閒趣涼
風一以吹黃花滿白露東籬四五尺欣然便跬步緬咏
古人詩采蕭猶所慕矧予餐落英竊取離騷句浮雲自
南來青山乍回互搔首看青山采菊忘其處微聞童稚
喧稍見炊煙聚雖無斗粟儲幸足壺觴具目送飛鳥還
野人亦歸去

寄懷虎臣三首

昨夜秋風生新涼動書幔夢見謫仙人騎雲渡河漢顧
我話心期蟬聯不能斷屈指天路長旌旗忽飛散寤聽

蟋蟀吟卷衣起嗟歎

吾聞華山高徑路不盈尺之子登其巔弱足生飛翼橫
行如騎牆豎行如上壁寄書相誇示好事有奇癖慚愧
臥游人閉關養微疾

橫行二句即將書中語

北望長安道車馬何喧喧亦有歲星客索米隱金門著
書或多暇行藥將無煩素心諒不緇宿諾在丘樊山中
叢桂發可以招王孫

哭侯研德

中年離別最傷神况復重泉哭故人四海量交誰急難
半生通隱獨憂貧虛傳素女教軒后

研德素學養生之術已見巫

陽召楚臣兄弟凋零妻子少那能回首不沾巾

一 同鄒評士登興文寺浮圖

振衣古塔幾由旬舫趁風高正暮春十里平蕪青草徧
千家煙火白榆新闌干寂莫常棲燕睥睨周遭少見人
惟有君山看不厭峭帆日夜下江津

三月三日在瀾江作

又是三春三月三離居江北憶江南流觴曲水竟何在
沽酒當釀劇不堪小圃誰家花隱約空堂有客燕呢喃
杜陵寂莫麗人賦閒看村姑出采藍

長歌題朱慎人行樂圖

我來瀾江四十日飛燕落花春寂寂主人惟有朱家賢
投車燒燭常留客此時鼠姑正發紅絳羅高捲闌干風
航船引滿不歸去花神並舞出簾櫳梨園法曲霓裳序
鬢鬢沉香張小部野狐龜年皆妙顏傾城尤愛周郎顧
周郎
且名主人大笑蹋氍毹酒酣示我招隱圖五湖咫尺將
終老此中之人卽陶朱兩宰巖城拜司馬一麾便落藩
籬下人生行樂復何須絲竹中年賴陶寫我歎此翁真
達人障面且避長安塵賤子有冠亦早掛畫作青山鳥
角巾相逢同是支離叟白眼看他牛馬走安得瀾江化
酒缸日對名花傾百斗樽前莫住捱纂手

戲東慎人

君家梨園皆妙年更衣垂手如神僊
春夜銀燈目苦短但聽嬌鳥啼
花前更聞外宅多蛾絲鴛鴦各伴
諸郎宿障面幸有真珠簾何不傳
教歌一曲

旅次無聊戲作香奩咏物詩二十四首

鏡

小匣芙蓉秋水盈相看無語不勝情
嫦娥月影分身現姊妹花枝對面生
朝挽媚髮香髻晚添愁黛淚分明
窵然背地聞郎笑新得佳人第二名

梳

新造犀梳月半規阿嬌春日曉粧時分開飛燕烏雙尾
捲起重楊綠萬絲心細頻將側鏡照力微每倩小鬟持
等閒綰出流蘇髻蕩漾東風憑裏兒

粉

眞色天然出宋家不教太白畧施些金盆弄處消香水
玉炤勻時籠月華新樣比風吹蛺蝶淡粧和雪蹟桃花
無端戲抓腮痕細更問良人漬木瓜

脂

蕭郎昨夜紫宸朝手捧銀罌下九霄塞外傳來新蠟艷
宮中點出小朱嬌

唐時胭脂最
品有小朱嬌

指痕一捻粘花片香氣

三分入玉簫懊惱錦屏瘳戲慣好防黃鳥豕櫻桃

黛

淡掃雙蛾向綺疏買來石黛出南都一稜斜月碧深淺
兩點遠山青有無秀色可餐看殿脚春風欲笑憶當罇
就中愛說文姝樣傳與張郎繡佛圖

髻

古挽髮爲髻今以紗絹爲之俗名丫髻

月樣團圓雲樣新上頭時節最宜人盤籠恰配呀光帽
墮馬渾同折角巾簪髮每愁玉導滑剪紗偏愛翠毛勻
近來學作女冠子贏得三郎喚太真

時髻剪雲垂帶號
妙常巾

髻

俗名髮

鬢髮如雲不脣加也同葉伴牡丹花

吳下有牡丹頭之號

驚鏡掠

就嘗垂雀蛇髻盤成似點鴉委地猶憐輸蜀主借人還
惜出陶家朝來頗厭蘭膏膩自沐香湯曬碧紗

釵

玉兒小篆九鸞文孫壽盤龍亦出羣金錯鏡前交細月
水晶枕上絆鬢雲行時翡翠垂垂顛墜處鴛鴦縷縷分

莫與狂夫沽酒慣防他司馬借文君

元稹詩泥他沽酒

花勝

王母戴勝卽此令人總名爲花

剪出隋宮五綵微玉人頭上鬪芳菲眞珠好嵌芙蓉蒂
輕粉能粧蛺蝶衣嬌燕只從簾外鬧狂蜂數向髻邊飛

春深怕有花神如細與東風辨是非

帕 俗名包頭

一幅烏紗裁半張摺成方勝掩輕黃薄披髻翼玄增鑑
低壓眉山翠倦揚梅殿故遮新點額晶屏先護曉霞粧
西風昨夜吹寒早添上昭君貂尾長 時粧有昭君套

珥 俗名耳塞亦曰環

巧刺天孫九孔針雙銜明月一鈎金琢成宛轉丁香結
引入纒綿梔子心舞罷每從席上墮粧完故向枕邊尋
瓊瑩雖美休充耳側聽情人寄好音

釵

螭螭領下鎖連環片片鐫成梵字欄三兩排行湘水雁
一雙比翼女牀鸞倦沾粉汗微嫌澁愁減香肌漸覺寬
護住春風結不解翳時先怯裏衣單

指環

俗名手託

曾記夫人喚阿環筍條輕束屈伸間榴臺掛出火齊艷

潘夫人大齊指環挂石榴枝上流環榴臺

蛩帽贖回翡翠斑

何充妓以翡翠指環換判繡筆

充以蛩蛩帽贖之

箏柱應添銀甲響繡牀時助綵鍼攀夜眠燈

下休教卸識取才郎指日還

釧

俗名錮亦曰釧

天上安妃跳脫殊阿蠻新賜臂支符

楊妃以紅粟臂支賜阿蠻

秤來

兩許猶嫌重雕出千般未厭麤弄久愛遮長袖翠倚多
愁損曲闌朱今年別號觀音婢約腕還加百八珠

衣

吳綾越綺總無分裁出針神絕妙文試着霓裳疑月女
倚來翠袖是湘君墨彈濃淡千絲雨線吐高低五色雲
近日圖衣皆以墨彈色又內外層層吐出五色號月華衣最愛背人偷解處汗香花
氣兩氤氳

雲肩

宮粧新剪彩雲鮮褒娜春風別樣妍衣繡蝶兒幫綽綽
鬢拖燕子尾涎涎筵前拊鼓宜垂手樓上吹簫許比肩

陸東美夫婦相愛人謂之比肩只恐巫山夜飛去倩持飄帶欲留仙

半臂 俗名背褙

更衣斟酌十分難新製輕紈祇半端取便最宜春起早
護嬌偏稱晚粧殘渾疑斷袖留遺愛却喜專房免忍寒

宋子京事曾與三郎換湯餅重提舊事淚闌干 王后謂明皇日三郎不記何忠脫新紫半臂更得一斗麩作生日湯餅耶

殊 俗名殊胸

湖羅三尺海棠紅結束層層閉上宮妃子金詞藏个裏

姬人寶鏡掛當中

用紅箱事

青牛帳底嘗凝露朱鳥窓前恰

避風何日與郎親解取最堪消渴玉酥融

帶

俗名汗巾

楚王宮裏舊妖嬈
羅帶雙迴垂半條
新繡花枝縈翠羽
密題錦字疊鮫綃
風前拘束能藏艷
燈下橫斜亦助嬌
惆悵空闌無伴侶
解來牢繫沈郎腰

香囊

羅囊賭得謝家安
細屑龍涎和百般
爲祝宜男偏辟麝
却憐待女更添蘭
昭儀體滑仍分媚
買午衣濃定合歡
一對鴛鴦同結佩
才郎賤妾總名檀

裙

瀟湘六幅更重重
裁作巫山十二峰
衣袂曲藏花窈窕

珮環時聽玉丁冬石榴開遍啼珠濕

用武后事

燕子飛回繡

帶鬆

用趙后事

無賴東風吹不住水晶簾下驗斜封

袴

誰把昭陽窮袴傳綵絲百結費周旋細腰貼處應難問
生手觸來劇可憐夜月半牀施繡褥春風一騎襯香韉
陶潛雖解閒情賦不作錦襦也枉然

襪

俗名滕襪

佳人昨夜剪春羅尺幅雙纏尚覺多繡出唐宮曾覆藕
步來洛浦便凌波開箱試取紅鸞帶曳地宜承烏鹿韉
樂府誰歌結襪子爲卿脫去更如何

鞋

一雙高底小紅牆金齒丁丁響屨廊采綠微沾花露滑
踏青賸印燕泥香盤中學舞行深淺簾內聽歌拍短長
賦盡錦鞋無覓處夜來狼藉枕函房

看朱園牡丹有紅紫二色

生成金屋可藏嬌何意東籬春色饒煙滿深宮憐紫玉
月明小院想紅綃倚歌誰領蒲萄酒伴舞還尋楊柳腰
回首故園羅幕捲銀缸檀板總蕭條

春盡

江城春盡尚餘寒紅雨廉纖石井欄苔草沿階客至少

楊花糝徑鳥銜殘鏡中白髮年飄忽夢裏青山路渺漫
獨把一杯成薄醉東風已過大長干

贈延令張因元

下馬城南客至止幽居小築林塘美別業無殊顛辟疆
主人恰遇張平子繩牀藥竈傍西樓樓外初啼黃栗留
涼風修竹剛銷夏疎雨新梧却近秋青芻白飯行廚具
胡餅江魚類佐箸飽餘同看輞川圖醉後閒吟蕪城賦
君家兄弟繼三張投轄陳遵驛鄭莊十日平原樂未足
驪駒忽唱上河梁感君意氣思千里還愁前路無知己
君不見臨邛令下逐客書長卿之游亦倦矣

合題王阮亭洗桐散花二圖

近代寫生誰敵手前有曾鯨今戴蒼虎頭殿謝何足道
下筆曾貌琅琊王琅琊王子神仙客騎馬揚州嘗邑邑
閒來岸幘抱琴堂琴聲彈向雙桐出呼童汲水洗桐身
青光靜照得吾神鈴閣喧塵不入耳悠然天際想真人
安心忽到阿蘭若仰看天女散花下三十二衆皆萎枝
香風更雨新好者我思隱居願尚賒公圖作佛志太奢
風塵要當存此意金門何必非毘耶戴生兩圖只如一
阮亭在焉呼之出乃知妙画有素心吾輩始見真顏色
吁嗟乎世間肉相稱公卿多買胭脂定得名進賢白羽

嫌未足會須贈汝金眼睛

虎兒詩二首

阮亭幼子三歲能誦唐詩百首蓋宿慧也席上口占
贈之

王郎三歲識之無跳躍天然千里駒日誦唐詩一百首
使君惟有捋髭鬚

杜陵家學好男兒驥子應輸虎子奇念遍唐詩總拋却
不如還念老夫詩

阮亭贈兒有杜陵宗武
之句杜云念得老夫詩

登北固山多景樓

五月乘高白袷涼眼前不盡景茫茫齊梁事業千秋邈

淮楚風煙萬里長山勢峻嶒吞埤坵江聲重疊送帆檣
老僧指點斜陽處金鎖拋殘舊戰場

已亥海寇塵兵干此

贈寫真朱生

朱子妙年工寫真頰上三毛如有神雲臺煙閣不足圖
貌予田園落莫人菩提之珠布衲襖人生如此影亦好
待予蒲團夢破時本來面目爲君道

三婦艷爲老蕩子李雲田賦二首

大婦漢陽住中婦武昌居小婦家何許窈窕生吳趨蕩
子打兩槳迎送無須臾

大婦工織錦中婦能檢書小婦無所爲掃鏡巧粧梳蕩

子坐飲酒楚歌而吳歎

壽嚴顥亭給諫太夫人

世務問嚴安青蒲真諫官朝班推豸角家訓本熊九西掖初焚草南陔正采蘭桐江魚信美爲爾佐春盤

贈謝傳公司李

使君匹馬下西京幕府山頭枕石城此地參軍多異績當年夢筆有高名星車初出青溪柵露冕常開朱雀桁寄語酒樓文讌客謝公墩上月偏明

燕子磯夜泊

不知王謝堂前燕何日飛來到此磯白石壘邊遺跡在

烏衣港口昔人非六朝簫鼓隨流水
萬里樓臺送落暉
顧我感懷無說處
片帆且趁曉風歸

丙午除夕

四十九年非翻然此夕違文章招隱去
山海倦遊歸燈
火催衰髮霜華逼練衣
空餘孺子泣無路向慈幃

看雲草堂集卷五

長洲尤 侗謨

自丁未至戊申止共詩七十六首

江南春追和倪雲林韻

江南三月富櫻筍黃鸝笑人簾幙靜王孫騎馬鬪春風
玉鞭飛過垂楊影傷心百代繁華冷館娃宮閣胭脂井
美人行酒莫沾巾楚舞吳歌等路塵

花信緩寒雨急落紅萬點錦城濕秉燭追春夜何及天
涯青草看成碧英雄遲暮常於邑少壯功名及時立勸
君努力磨青萍明月鏡吹驃騎營

周櫟園司農席上賦贈

當今豪傑不數見萬未之望惟周侯吾聞公在閩海日
人士趨之如東流盛名所集謗亦起射工含沙應龍囚
黃符碎來白日暗擁車老稚啼啾啾甌越八州十萬戶
舉旆闕下守不休賓客舍人牽連坐爭磨寶劍爲公
抽衆心成城不可拔豁然天聽回前旒貫索慘淡雨
澤竭庶女叫霜烏白頭漢廷有詔赦周勃孤臣勞績同
安劉解卿銀鐙還故節碧油紅旆臨青州東山霖雨及
南國福星一路入斗牛長干門外車馬滿僕時亦登孫
楚樓玉露垂牀柵花發張燈高館數觥籌乃公意氣飛

揚甚推倒岱岳唾滄洲縱橫燕趙齊秦楚甲乙班馬韓
蘇歐博蒐趙氏金石錄旁羅米家書画舟僕也舉解浮
大白願公勲業銘鐘卣卽今 朝廷急轉運蒼生待命
可無鳩筆墨瑣屑祇糟粕衣冠渾雜多戈矛古人才多
每易盡或云道廣則難周易不焚書謹謝客懲羹炊臠
亦良謀先生笑謂天下事老夫幸在君何憂君見俗吏
齷齪輩刀筆而外無他求放衙筭緡喧肉鼓手板奔走
如傳郵有文百軸束高閣莫逢故人同仇讐余思熱官
真爛熟所以樂從諸君遊蔣山蒼翠淮水碧相與岸幘
吟清秋四座歎息起爲壽信哉當今豪傑惟周侯

毘陵口號

糧船剝淺小舟被捉

毘陵一尺路來往划船難挾貨增糧重排幫擠水乾行
人疑有虎守地似無官書劔成飄泊連天風雪寒

長沙楊長公贈詩見懷依韻答之并以爲別

楊雄才大似相如天末貽來尺素書司馬世家青史在

司馬九疑先生明末殉難

雕龍文字錦囊餘偶過吳苑思招隱又轉

湘帆賦卜居爾到長沙訊賈誼悲風千載尚愁予

讀弘覺國師北遊集有感却寄

吾師道德比南陽 先帝親頒詔十行豎拂每聞前席

語着衣猶憶內壇香

聖朝自不遺菅蒯上座何緣揚

糝糠匏落不材長廢棄餘生祇合侍禪牀

生日志感再用前韻四首

最傷哀樂是中年思結寒泉倍泫然家事幾何三管筆
官差無奈一丘田汗遊難學盧敖放肥遯終輸祝牧賢
惆悵茂陵玉匣閉子虛賦就有誰憐

不如變姓且逃名書劔飄零學未成萬里關河休浪迹
百年草木總虛生逐貧有賦長呼哭却病無方但守庚
富貴幾時行樂晚漫勞歲月費研京

半百年過意不如

倒用杜句

看雲藜杖倚菰廬平生最拙惟

謀食一事差強已廢書蕭瑟江關哀庾信飄搖風樹泣

臯魚何當燕市尋屠狗酒酒荒天弔望諸

曆經五閏幾磨跼

予生戊午閏四月是
今丁未凡閏五閏

世事安能問孰

何貧去鮑生知我少老來鄧禹笑人多偶登廣武興長
歎曾入咸陽噫短歌慚愧年年采藜藿不知天上有酥
陀

江上午日

梅雨蕭蕭五月寒寂寥佳節滯江干齊眉菖葉綠堪結
照眼榴花紅欲殘舊俗紛拏傳解粽古人哀怨想紉蘭
年年此際成漂泊酒入愁心醉亦難

送徐德雨遊滇南

萬里滇陽賦遠遊少年慷慨數南州山連玉案天文出
江合盤龍雲氣浮笳鼓秋高思入幕烽煙夜靜罷登樓
碧鷄金馬年年在待爾題銘鐵柱頭

寄李膚公

與君同庚復同閏仙李蟠根獨高峻孝經忠經傳家訓
在詩考槃易肥遯自慚浪迹窮無之不狩不耕雙鬢絲
清秋木落風雨時訪君江干話酒卮

咏水

澤腹因風壯稜稜玉井欄垂簷妃子筋照席侍中盤攬
鏡疑增陵擁書畏助寒長安多此物盡作假山看

寒杳

白髮愁無寐寒更聽獨淒徘徊長夜苦斷續朔風低遠
塞和征雁荒城催曉鷄佳人多好夢莫到画樓西

晏起

獨寤原無夢其如懶起何窓嫌霜氣重枕覺日光多藥
茗隨時進蓬蒿少客過翻憎黃口雀侵曉鬧庭柯

白酒

鄉村十月白雅號杜茅柴竈下煨方熟牆頭過亦佳差
強烹雪水且免典金釵下酒惟鹽豉無妨詭短齋

瀨許詩三十韻

南吉許子命作懶許詩僕本懶人因有觸焉戲排長
律贈之

誰擅嵇生癖無如許子宜家貧因省事身退且隨時有
室居何陋無田棄不治閉門惟裹足隱几獨揩頤五夜
眠常早三朝起每遲薄寒弛櫛沐小暑罷巾綦雪稱袁
安臥園辭董相窺榻懸徐孺子塵滿庾元規磨滅稱衡
刺倒施山簡離臨池猶坦腹入社亦攢眉着屐嫌山遠
乘船怕浪危摘花待雨落掃葉借風吹壁任琴絃絕窓
從絲網垂熏爐香斷續鄴架卷參差倦讀愁魚豕難書
厭鼈龜圍棋殘半局和韻缺全詩座右慵揮塵筵前強

舉厄徐行還躑躅，偈語竊嚙唳。襪倩張君結，七須漢帝持。脫靴呼力士，搔背乞仙姬。鄰婦分燈照，村童借米炊。翻羹休老婢，潑墨恣嬌兒。長者頻訶責，家人漫笑嘻。吾衰原未老，僕病已難醫。十口皆虛耗，一身半黯癡。窮疑憑五鬼，頑欲斬三尸。迂濶雖違衆，優游自得師。分明子像贊，竟作爾評詞。幸甚都堪此，欣然一寫之。木人贈土偶同類乃相知。

贈顧佩堅蜀中扶襯南還

一官萬里殉孤城，孝子間關半死生。幾點寒星開墓道，數行哀雨寫銘旌。足穿劒閣蒼藤斷，舟下瞿塘白浪平。

竟化子規歸去切西風啼血送行程昔人詩云應是子規啼不到故教我
父未歸家蜀產子規故用此意

鳳凰篇寄蔣虎臣督學

丹山產異鳥自名曰鳳凰所栖瓊樹枝食者瑇瑤其
聲若參差提扶與歸昌末世多網羅此鳥常高翔一朝
重華出飛舞夔龍旁命爲百鳥師嘉子美文章一鳴日
月旦風雲爲飄揚朱鷺振西離紫雁賓東廂碧燈集翡翠
綠水汎鴛鴦九扈旣齊列五雉亦重行學鳳不至鳳
唳咤各有長翩哉五色文散之羣輝光蔚爲王者瑞至
治升軒黃南方有鷦鷯籬下獨潛藏決起捨榆枋控地

亦鏘鏘思從鳳凰游聳翼望高岡衆鳥大笑之管蠡何
能量東魯聖孔子接輿歌楚狂

慧泉行贈吳伯成明府

吾聞陸羽品泉七十二慧山位置廬山次玉繩金線豈
足珍龍躍虎跑未爲異味如掌露色如雲往來井井嘉
澤間借問此泉誰得似惟有臣心如水之賢君昔年吳
隱之一款千金志不移惜乎吏清水自濁何似廉讓之
間名雙垂誰知延陵老孫子竭來梁溪宰百里牛刀一
割烹小鮮桴鼓不鳴謳歌起 璽書屢下追鋒車萬人
臥轍行踟躕東東衙鼓公事畢笑指青山停干旗草亭

新就花明瑟時倒接羅宴賓客醉揮白墮呼盧全松風
七碗清詩骨古泉名陸子今泉號吳公吳公第一泉第
二天下健者惟公雄

戲擬昌谷體贈顧天石

天馬簡雲江東雙蹄金聲玉壓首口吐坤乾繡蚪蚪
虎頭將軍家兒異秋水剪瞳星羅胃筆牀曉夜搖紅翠
東鄰珠娘待宋玉鴛鴦交交舞銀燭春風羅衣吹未足
闐闐腫臃鏗華鐘天子端坐青陽宮視爾鼓鬣成蒼龍
飲秦留仙山園二首

無邊春色至結束在名園楊柳方垂戶桃花亦近源亭

臺隨地設裙屐逐人喧豈識幽栖意攤書獨閉門

主人雖避俗客至喜開樽餽啜皆精妙文章共討論坐
花春曉晚岸憤月黃昏車馬長安陌誰憐芳草繁

維揚遇計甫草讀其游草感贈

問君三月住揚州騎鶴吹簫何處樓名紙應逢官長怒

藥囊却爲故人留

甫草以醫侍宋
其武先生疾

荆卿市上歌聲苦豫

讓橋邊衫色愁歎息英雄多失路明朝疋馬又西遊

瓠子河店題壁

歇馬荒村倚曲牀酒家小婦解排當鷄鳴又渡黃河去
殘夢無端繞綠楊

宿泰山下病不得登

翹首忽青嶽鬱然雲起封古碑丞相字列樹大夫松濟
勝乏雙屐臥游知幾峰明朝車過處闐闐正鳴鐘

真定遇方邵村却贈二首

滹沱河北遇方干憔悴風塵青髻殘萬里沙場久戍苦
三年版築大工難天涯飄泊愁疲馬柱後淒涼弔素冠
邵村方讀禮回首并州舊游地莫勞客夢入長安 舊令獲鹿

少年豪氣滿京都遼海生還興未無杜曲亂離妻子在
朗陵凋謝弟兄孤殊方風俗存詩史羈旅情懷寓画图

邵村工画又著寧古塔詩

幸有太和春色好相逢寧惜剪菖蒲

太和春真

定酒名

登陽和樓

撲面黃塵歎遠遊，披襟暫上此高樓。
巖關百雉山河壯，戰壘千年草木秋。
月黑狐狸緣屋角，日斜牛馬散城頭。
登臨不盡興，衰恨漫剔殘碑看絳侯。

樓有周勃碑

大寺禮佛訪笨上人不遇

搗來蘭若禮諸天，古迹猶存大業年。
傑閣峩巖堯臨九陌，法身具足覆三千。

像高七丈

丹青壁暗苔花澁，梵宇函開金

葉傳

寺有唐人匾壁前宋金字法華經

欲向維摩問消息，毘耶深掩了

無禪

題梁宗伯蕉林書屋

暫解尚書履，棲遲綠野堂。
蕉陰周古屋，竹簡滿繩牀。
風入千山近，雲深五月涼。
還容倦遊客，散髮咏滄浪。

飲梁光祿泠然堂

三徑如秋水，一樽當暮天。
自嫌襜褕至，却喜竹林眠。
老樹無喧鳥，空階有暗泉。
不關風月好，客思已泠然。

遊梁金吾園林

逃暑郊坰盡，日晡南塘遺。
業問金吾短，籬數曲古藤。
蓋大木千章，獨鳥呼談劇。
且堪河朔飲，臥遊如在朝。
川圖醉餘忽發臨，流興笑向銀牀引。
轆轤北地無池，惟汲井灌園耳。

諸梁招遊少宰白蓮亭

東山別墅古城邊，謝客招攜看白蓮。
仙子霓裳初向月，夫人素面獨朝天。
碧筒吸盡香生握，團扇歌殘風滿筵。
却憶江南溪上女，紅裙裹鴨木蘭船。

沈繹堂副使過真定小飲黃瑟躬別駕署中

斑馬蕭蕭露草痕，征衫未脫問寒溫。
三年不見人吳苑，六月相逢官薊門。
手版驅馳仍道路，牙牀偃仰暫琴樽。
故交雙鬢今搖落，對爾還持寶劍論。

送邵村歸維揚子長歸吳門

驅駒滿路送君歸，我獨臨歧賦式微。
斜日一鞭隨獵騎，

大江雙繫渡漁磯
月明隋苑聞簫吹
楓落吳宮看雁飛
躑躅京華成底事
故鄉東望欲沾衣

愁霖

七月八日

皇天何淫溢
后土盡洼淖
月鬼乍離畢
曦影竟埋照
浙瀝晝恒漏
滂沱晦彌漂
風摧多濕柯
雲蔽無乾嶠
高檐響飛瀑
空除積沉澳
東山鶴鳴埵
北戶蛙生突
城浸晉陽
版村減馬陵
竈茫茫滹沱
河浩浩邯鄲
道平疇斷聯
騎枉渚息孤
擢不逢郭西
樵寧見溪南
釣蓬婦怨纒
弱臺峻歎田
澇暗壁寒螿
啼枯巢餓鴟
叫嗟哉羈旅
人形影憺相
弔祇睇故鄉
悲難望長安
笑出門子馬
踟入門

清雲草堂集 卷五
我僕慄久客食不飽久雨衣不燥飄瓦漏泥牀崩垣扶
檣輿簾簿旣搖蕩衾裯亦顛倒踵决阮孚屐角折林宗
帽音澁中散絃氣短步兵嘯獨歌行路難再變思歸調
逝當返丘樊幽居豁清抱坐讀秋水篇終焉悟玄妙

又雨

天乎何爲雨無止俾滂沱矣靡昏朝迅雷烈風相砰激
高岸深谷皆漂搖忽驚空山走瀑布遂見平陸生波濤
城門堅閉如拒敵村舍顛倒爭奔逃婦女登車繫大樹
丁夫縛筏鎖橫橋高粱淹沒小米死牛羊無圈鷄無巢
嗟予適來當此厄旅人先笑後號咷玉川祇借半間屋

杜陵已捲三重茅，抱柱恐浮尾生女。崩椽將壓公孫僑，
子桑裹飯凍欲倒。鄧禹蒸薪濕難燒，異鄉桂玉日不給。
况又罷市斷漁樵，出門一步行不得。閉戶獨臥仍無聊，
顧視僮僕少人色。胡爲泥中來，譏嘲我欲叫。闔苦無力，
精衛填河空焦勞。不如長歌以當哭，夜呼山鬼讀離騷。

涿州題壁

昔年乘傳地，此日策駒來。古道猶無恙，遺民劇可哀。
四郊多澮壑，千畝半蒿萊。翹首南飛雁，空傳人字回。

贈孫赤崖二首

有序

孫子赤崖出關十載，戊申八月予在潞河，忽然相遇。

把酒道故悲喜填膺自言向依 輔國幕中得其周
振坐間曾詢鄙人在蒙獎歎感

先皇之遺眷荷 帝子之新知攀附有懷趨承無路輒
吟二律以貽孫子流連愴慕情見乎辭

蕭瑟邊關憶故人十年復面淚沾巾吳門南望愁羈客
遼水東流哀雁臣白月龍沙春似夢青山木葉雨如塵
挑燈話盡天涯恨一夜霜風滿潞津

逐客南冠劇可傷緇衣何幸遇賢王情同江表登樓賦
業在淮南招隱章朱殿曉開陳酒醴雪園夜對辨宮商
自憐宣室飄零久猶說長沙問洛陽

傷劉逸民夫婦

逸民死尚陽堡其婦爲盜所害

少日文場載酒遊
臨邛綠綺羨風流
忽驅北轍歌燕市
翻戴南冠泣楚囚
冤逐黃沙埋異域
血沾紅粉殉哀丘
人生只合田園老
藜杖蒿簪便白頭

謝別龔大司馬

驅馬關河春復秋
掃門僅一見廬州
陸生入洛仍烏角
謝傅登壇正黑頭
大雅未凋松栢在
小山終援桂枝留
美人繡段勞持贈
難爲張衡解四愁

謝別宗伯王夫子

十年不侍扶風帳
此日重登元禮門
大老威儀三代古

先生書策六經尊得難
夜火窺新語每坐春風感舊恩
弟子困窮無一似天寒驅蹇返江村

贈別宋右之侍讀

不見廣平今六年
剪燈話舊轉茫然
江湖翻覆非前日
鱗羽飛沉似各天
顧我自彈燕市筑
多君相贈繞朝鞭
西風吹醒東華夢
應憶村農野水邊

右之齋中遇子玄
赤崖子俶其年彥
和宮聲菽蒴
同飲有作

九月賓鴻集上都
喜從臺閣話江湖
相逢席上鄉人飲
似回天邊旅客圖
皂帽青衫同涕淚
黃花白酒且歌呼

明朝馬首成追憶落日寒沙又滿途

出都有感

三宿長安便出門去來聞見不須論無官自覺輕車速
作客空羞敝橐存紫塞頻年猶入夢青山是處可招魂
茂陵玉椀今安在惟有相如感舊恩

宿瑟躬署中重贈

萬里西風去路賒停車且止故人家客愁難貫新豐酒
官冷宜看彭澤花似是馬曹無散騎祇多古樹足啼鴉
不因話別流連久整日垂簾罷早衙

渡滹沱

策馬渡滹沱中流發棹歌青山餘王氣白水渺文波帝
子寒氷解將軍大樹多銅臺仍寂莫前路又漳河

途中有歎二首

鷄鳴戒旦問征衣日薄西山馬未歸客况已隨林葉落
鄉心欲逐隴雲飛關河閱歷黃塵在風月消磨白髮非
回首故園秋色好蘆花釣艇細鱗肥

夢中暫見淚沾衣遠望青山不當歸好景漫隨流水去
孤踪愁作斷蓬飛野堤沙草年年換京國風塵日日非
五十驅馳猶策蹇東來千騎盡輕肥

雁字詩二十首

長天萬里白無塵
一陣驚鴻墨跡新
莫道禽經無正義
春秋大筆特書人

寒江水落蓼花開
點點平沙寫却迴
寄謝山陰諸道士
肯將此字換鷺來

王家法帖庾家書
野鷺家鷄總不如
好與遠人傳尺素
不勞江上覓雙魚

臨池未肯學鴉塗
舞鳳迴鸞自彷彿
此去康成宅畔宿
但銜書帶不銜蘆

西風入塞度榆關
楚尾吳頭朝暮間
回首紫臺憐舊侶
故題錦字寄陰山

青楓綠柿樹槎枒一夜霜華染赤霞
恰遇雁來題葉遍美人閣筆坐窓紗

飛白翩翩帶八分徘徊宛轉似迴文
六書更是諧聲切寥唳清商曉夜聞

鐵畫銀鈎刻古釵風流還借五雲排
漫啣草聖看蛇鬪不及天邊小楷佳

丹山鳳尾布絲綸第一書名誇雁臣
亦有雁奴能解事不妨小婢學夫人

柳骨顏筋浪得名鸞臺簪筆挾飛鳴
若逢少昊分官日可拜中書封管城

龍負河圖龜獻疇于今更取雁書修高文典冊當何用
大手堪成五鳳樓

單宿雙飛三十強參差十七十三行一波一點渾無別
豈是同文出鳳皇

九鳩七鴉各分飛解得禽言字說非惟有燕能書乙字
難將朱鳥聘烏衣

玄草誰知奇字工數奇咄咄只書空蒼鷹有眼何曾識
却愛將軍兩石弓

煮字由來不療飢枯田難覓稻梁肥輸他野鴨多庸福
飽啖銀絲臥釣磯

網羅滿地欲何之文字藏機劇可危鸚鵡洲邊休作賦
鷓鴣嶺下莫題詩

金母臺前青雀傳木公殿上紫鴻便煩君更爲書天問
叫破重關索報箋

蒹葭水國路微茫怨入離騷寫幾章寫到衡陽應絕筆
又隨春雨下瀟湘

揮盡千行一字無長空秋色浩平蕪人間那得蘭亭帖
墨客空勞筆陣圖

箏柱琴絃絕調孤鴻才豈僅識之無何當乞汝丹青筆
一幅秋江好四圖

白楊二首

白楊聲急最蕭蕭
落日悲風萬鬼號
不信江南芳草岸
綠衣解舞美人腰

奇光閃閃似青燐
此物原非屋下陳
吾意北窓高臥日
陰風蕭颯却宜人

送彭雲客之長寧

十年雷雨鬱經綸
此日登車墨綬新
行色一帆江月曉
到時千樹嶺梅春
羅浮燕子留仙令
南海珊瑚貢越人
坐玩碧鷄噉馬甲
使君風俗已還淳

題画

黃山老人年古稀摩娑畢妙餘清輝斷橋煙樹景寂歷
疑有仙翁坐翠微